

四庫全書

集部

欽定四庫全書

集部
唐宋元名表卷上之二

詳校官中書_臣李采

侍讀_臣孫球覆勘

總校官編修_臣王燕緒

校對官編修_臣邱度澄

謄錄監生_臣談雋

欽定四庫全書

唐宋元名表卷上之二

明
胡松 撰

宋

謝賜玉帶表

王介甫

臣安石言某月日伏蒙聖恩以收復熙河洮岷疊宕等
州特加褒諭親解玉帶賜臣者尸臣列侍方臨極辨之
朝暫御瞻傳獨拜非常之賜寵綏狎至懇避弗俞焜燿

有加凌兢無措

中謝

竊以河洮之業兆自聖謨方虎之材

進非師錫片言投匭遂察見其有孚衆訛盈庭預照知其無青以至授兵算食蒐卒第功能畢協於始謀實仰歸於獨斷如臣蕞爾何力有焉伏惟皇帝陛下善貸其成勞謙不伐弛曠鰥之大責錄將明之小忠揚於廣除委以珍御瑟彼英瑤之質煥乎華袞之言臨授用光顧榮踰於古昔退藏惟謹知燕及於雲來施更厚於解衣報敢忘於結草臣無任

除左僕射謝表

臣某言伏蒙制命授臣尚書左僕射者貳令中臺兼官
左省惟時遴選蓋嘗久曠而弗除忽此叨居顧豈微勞
之可稱陪敦厥邑敷告於廷是皆至榮難以虛辱中謝竊
以經術造士實始盛王之時偽說誣民是為衰世之俗
蓋上無躬教立道之明辟則下有私學亂治之姦氓然
孔氏以羈臣而興未喪之文孟子以游士而承既沒之
聖異端雖作精義尚存逮更煨燼之災遂失源流之正

章句之文勝質傳注之學溺心此淫辭詖行之所由昌而妙道至言之所為隱篤生上主純佑下民成能協乎人謀將聖出乎天縱作於心而害事放斥幾殫通於道以治官廷登既衆尚懼膠庠之黎獻未昭典籍之羣疑乃集師儒具論科指繕書來上裒典俯加臣趣操弗高知識尤淺少嘗勤苦但為裘氏之吟晚更耄衰豈免輪人之議初備使令之乏即知稱愜之難敢意誤恩獨當殊獎此蓋伏遇陛下以化民成俗為事故急在誨人以

尊德樂道為懷故易於縻爵因忘固陋特假龍光祇服
訓辭深惟報禮雖無博學對揚稽古之鴻名庶以雅言
助廣右文之美化臣無任

進修南郊式表

某月日臣某等伏蒙聖上命修南郊式進呈者郊丘事
重筆削才難猥以微能叨承遴選

中謝

蓋聞孝以配天為

大聖以享帝為能越我百年之休明因時五代之流弊
前期戒具人輒為之騷然臨祭觀成事或幾乎率爾蓋

已行之品式曾莫紀於官司故國家講燎裡之上儀而臣等承撰次之明詔迨茲彌歲僅乃終篇猶因用於故常特刪除其紛冗恭惟皇帝陛下體聖神之質志文武之功嘉與俊髦靈承穹昊物方髦茂以薦信而無慙人且昭明知因陋之為耻固將制禮作樂以復周唐之舊宜終循誦習傳而守秦漢之餘則斯書也譬大輅之權輪與明堂之營室推本知變實有考於將來隨時施宜亦不為乎無補臣無任

生皇子賀皇帝表

宮闈嗣慶寰海交忻凡逮戴天惟均擊壤

中賀

臣聞螽斯

之言衆子實為王者之詩華封之祝多男亦曰聖人之
事恭惟陛下紹祖休顯憲天聰明致文武之憂勤成堯
舜之仁孝宅師無競莞簟之寢既安傳類有祥弓韞之
祀屢應貽謀方永錫類用光臣託備藩維叨承睿獎不
顯亦世家實預於榮懷於萬斯年心敢忘於慶幸

賀生皇子表

嘉慶疊傳歡欣總集臣歷觀古昔誕受福祥厥配天所以久長乃有子至於千億伏惟皇帝陛下鳬鷺之雅媚於神祇芣苢之風燕及黎庶弓韜嗣燕謀之報旄旗仍罷夢之祥無疆惟休永保桑苞之固有室大競方觀椒實之蕃臣嘗汙近司久尸榮祿特荷殊憐之至豈勝竊喜之深

又表

皇運至隆天枝彌茂照臨所暨鼓舞攸均臣聞史紀文

慶之延豈惟十子詩歌如徽之繼爰至百男肇敏於修
乃繁厥祉恭惟皇帝陛下道冒區宇德冠往初品庶蒙
休既饗和平之樂神靈錫羨果膺蕃衍之祥臣嘗忝近
司備叨殊獎以宿痼而自困欲旅進以無階

謝知制誥表

高華之選欲報嘗難固陋之身以榮為懼切以自古招
智能之士因使為侍從之臣豈特賴其虛名謂能華國
蓋將取其實用相與致君矧號令文章之為難而討論

潤色之所寄苟失職不稱則為時起羞伏惟皇帝陛下
躬上聖之資撫久安之運趨時有救弊之急守器有持
盈之難當得賢俊使備遺忘且典司明命出入禁門一
有瘕官尤為累上臣羈單賤士鄙朴常人仕初有志於
養親學遂不專於為已比更煩使稍竊謬恩內懷尸祿
之慙仰負食功之意又蒙採擢以至超踰蓋君之視臣
不使同犬馬之賤則下之報上亦欲致岡陵之崇況臣
少習藝文粗知名教遭逢一旦度越衆人唯當盡節於

明時豈敢尚懷於私計

謝賜對衣鞍馬表

出大庭之顯服束以精鏐引內廐之名駒傳之錯采隆
恩所逮朽質知榮竊念臣弱力淺聞久憂積疾中預從
官之選外分守將之權僅免譴訶更蒙收召論思潤色
曾莫效於微勞衣被服乘乃前叨於異數此蓋伏遇皇
帝陛下釀於慶賞詳在招延因示眷懷使知奮勵誓竭
愚忠之報異無虛授之嫌

乞罷政事表

私懷懇至已具布聞聖訓丁寧未蒙開納敢冒崇高之
聽再輸悃悞之情臣聞任賢之方要其有用陳力之義
止於不能苟弗集於事功且重罹於疾疾豈容叨據以
累明揚伏念臣猥以孤生親逢盛世昧於量已志欲補
乎休明失在信書事浸成於迂闊每煩衆論上溷聖聰
久知素願之難諧繼以積疴而自困辭而去位庶逃竊
食之誅勉以就功重荷包荒之德雖暫順命終懼妨功

伏惟皇帝陛下閔度并容大明俯燭特垂矜允俾遂退藏如此則孤進之身獲全生於末路具瞻之地得改命於時材

謝朱炎傳聖旨令視事表

使指遄臻訓詞俯逮敢圖衰疾尚悞眷存伏念臣曲荷搜揚久辜付屬有能必獻未嘗擇事而辭難無力可陳乃始籲天而求佚然方焦思有為之日以此懷恩未報之身苟營燕安豈免慙悸伏蒙陛下仁惟求舊義不忘

遐乃因乘輅將命之臣更喻推轂授方之意踦履無用
誠弗忍於弃捐朽株匪材尚奚勝於器使永惟獎勵徒
誓靡捐

賀冊皇妃表

明備之禮發於宮闈驩康之聲播於寰海伏惟陛下考
古之憲刑家以身乃資婦德之良俾貳坤儀之政蓋關
雎之求淑女以無險詖私謁之心鷄鳴之得賢妃則有
儆戒相成之道於以求助不專為恩臣生逢明時切觀

盛事祝聖人之多子輒慕堯封思令德以式歌豈慙周雅

漳州進珠表

王冕

宋大中祥符六年春冕自廬陵移典是郡越明年三月
龍溪屬邑民丘顥於九龍溪網魚得珠一顆一圍闊三
寸七分中有小珠七顆如七曜次如七曜者不可勝數
縣弗敢留函珠上之於郡冕熟而視之殊大歡忭即日
召厥屬官以驗之復相稱慶曰夫珠至寶也王者德至

淵泉則出今天子仁且聖方以寬慈被天下宜乎珠之
出獎聖世又珠之為物也其色瑩淨明清乃化民之象
也於是列表以進尋奉勅書以旌至寶冕既叨為政能
獲斯寶又懼是事泯絕於後刊之貞石於公廳之左用
傳於永永耳臣冕言臣聞皇猷允塞天乃效祥聖德升
聞地不藏寶前珠得非蛇口產異蚌胎有感必通生自
煙潭之內無脰而至忽居寶肆之中熒煌外散於月華
皎潔內含於星彩此盖皇帝陛下齊莊奉道清淨化民

體乾極以握符致坤靈而薦瑞遐稽信史迥殊照乘之
光洞究祥經弗類媚川之色臣握蘭郎署剖竹侯封幸
逢江海之珠難藏外郡願繼梯航之貢干黷內庭

代高麗王謝賜燕樂表

十行賜札誕彌遼海之邦萬里同文普聽鈞天之樂俯
慚虛受中積愧懷伏念臣錫壤三韓襲封四郡環居島
服習聞夷黻之聲仰睇雲門實眩咸池之奏方重華之
上治躋累洽之闕休監二代之敷文命一夔而制樂登

歌下管天地同流鼓瑟吹笙君臣相說加貢鹿革之饗
輔成魚藻之歡有懷䟽逖之臣亦與分頒之數玉帛萬
國干舞已格於七旬簫韶九成肉味遽忘於三月仰止
祝敵之賜鬱然食侑之光驟此叨居殆無前比茲蓋伏
遇皇帝陛下躬持慈寶丕冒仁恩通道八蠻坐致遠人
之悅同符五帝肇聞古樂之興出大成之珍藏作朝鮮
之榮觀兜離一變慈惠均敷蕩蕩乎無能名雖莫見宮
牆之美欣欣然有喜色咸與聞管籥之音稽首拜嘉周

邦來賀臣敢不服膺睿獎謹度遐方仰九門之句傳徒
起戴盆之望與百獸而率舞但深傾藎之心

皇子謝賜御書孝經十六句表

孫仲並

臣某言伏蒙聖慈賜臣御書孝經十六句者睿謀垂裕
夙承父訓之嚴神晝䟽恩備舉聖經之要因心立教拭
目知榮臣某惶懼惶懼頓首頓首惟夫子之發微言為
魯參而陳孝道首述君親之事謹始及終復虞富貴之
移戒危與溢身行口言之無失天經地義之兼該事可

法德可尊表裏俱正居致敬養致樂造次弗違神明四海以交孚進退一忱而匪懈有倬飛鸞之翰於昭貽燕之謀二八句之特書撮其樞要千萬人之咸悅始於家邦仰倣邇英之屏俯殊制旨之注矧熙朝資善之學肇祥符丙辰之春詔儒臣而讀是經錫宸章而刊諸石泐觀洪藻宏賁前猷臣德匪溫文性慚岐嶷出有師入有保蚕齒虞庠親則父尊則君恪趨周寢曩者分封之渙號誨之全孝以移忠旨趣會於五經未窺聖蘊德教加

於百姓徒仰皇仁載觀河洛圖書之光如親洙泗問答
之語茲蓋伏遇皇帝陛下學稽古典筆寓天常作嗣萬
年受祉而及於子冠冕百行得手而應於心祖武可稱
人文增煥臣敢不聿嚴琰寫式廣家藏朝夕歌六章之
詩遠邁唐宮之賜札夙夜事一人之訓恭修建邸之陳
圖

潭州通判謝上表

歐陽永叔

始竄嶺南人皆謂之必死及遷湖外恩實出於再生仍

復前官俾闕郡政仰叨成命增激微衷切念臣寒禮仍
親道德未稱洎以茂辰膺茲鴻典珽輪飾駕奮五采以
相宣碧鏤題宮配二儀而胥永臣以濫叨詞職竊守藩
封昭數在庭莫觀鑾旌之美含和發詠率同鳬藻之誠

謝復龍圖閣直學士表

恩還舊職事雪前誣感極心驚涕隨言出臣伏見前世
材賢之士身結主知勲德之臣功施王室然尚或一遭
謗毀欲辨無由少忤要權其禍不測顧如臣者何足道

哉臣材不迨於中人功無補於當世用之未見有效去
之無足可思矧罔極之讒交興而並進易危之迹何恃
而不顛而聖心不忘恩意特至辨罔欺於曖昧沮仇嫉
於衆多雖暫居譴謫之中而屢被陞遷之渥今又特蒙
甄錄牽復寵名以臣之愚豈比前人而獨異推其所幸
蓋由聖主之親逢謂宜如何可以論報再念臣稟生孤
拙本乏藝能徒因學古之勤粗識事君之節苟臨危效
命尚當不顧以奮身況為善無傷何憚竭忠而報國誓

期盡瘁少答高明

南京留守謝上表

守宮鑰之謹嚴敢忘夙夜布政條之纖悉上副憂勤寄
任非堪兢營並集伏念臣賦才庸薄稟數竒屯毀譽交
興兩嘗過實寵榮踰分動輒招尤念報效之未伸敢不
竭忠而盡瘁因風波之可畏則思速去以深藏迨此六
年外更三守學偷安而杜口負素志以媿心朽質易衰已
凋零於齒髮良時難得尚希慕於功名豈謂皇慈未捐

舊物擢從支郡委以名都惟此別京舊當孔道簿領少
克勤於職事厨傳多取悅於路人僅從俗吏之所為雖
能免過非有古人之大節未足報君

亳州謝上表

貳政非才雖獲奉身而退分符善地猶懷竊祿之慚祇
荷寵靈惟知戰懼伏念臣章句腐儒之學也豈足經邦
斗筭小器之量也寧堪大用而叨塵二府首尾八年荷
三朝之誤知罄一心而盡瘁若乃樞機宜慎而見事輒

言陷穽當前而橫身不顧竊尋前載未有能全昨怨出
仇家構為死禍造謗於下者初若含沙之射影但期陰
以中人宣言於庭者遂肆鳴梟之惡音孰不聞而掩耳
賴聖神之在上廓日月之至明悉究罔誣遂投讒賊再
念臣性實甚愚而疎於接物事多輕信者蓋以至誠自
矢如彼匪人失於泛愛平居握手惟期道義之交延譽當朝
常丐齒牙之論而未乾薦禰之墨已彎射羿之弓知士
其難世必以臣為戒常情共惡人將不食其餘而臣與

遊既昧於擇賢在滿不思於將覆自貽禍釁幾至顛隲
上煩睿聖之保全得完名節於終始及懇辭於重任尤
深惻於皇慈雖避寵辭隆僅能去位而清資顯秩愈更
叨榮莫逃僥倖之譏實負心顏之覲斯蓋伏遇皇帝陛
下乾坤大度堯舜至仁察臣自取於怨仇本由孤直憫
臣力難於勉強蓋迫衰殘既獲免於非辜仍曲從於私
欲遂同萬物俾無失所之嗟未盡餘生敢忘必報之效
謝止散青苗錢放罪表

有罪必誅是為彝典原情以恕特出深仁聞命驚慚省躬涕泗伏念臣以一介之微賤荷三聖之獎知寵祿既豐初無報效筋骸已憊尚此遲徊曲蒙大度之并容誤委一方之寄任職當撫俗責在分憂方茲旰昃之勞心豈敢因循而避事昨遇國家新建官司而主計大商財利以均通分命出使之車交馳於郡縣悉發舊藏之鏹取息於農氓而臣方久苦於昏衰初莫詳其利害既已大喧於物議始知不便於人情亦嘗畧陳衆弊之三冀

補萬分之一屬再當於班給顧已逼於會期雖具奏陳
乃先擅止據茲專輒合被譴呵豈謂伏蒙皇帝陛下深
軫睿慈俯矜朴拙免從吏議特貸刑章夫何草木之微
曲被乾坤之施臣敢不益思祇畏更勵操修戒小人之
遂非希君子之改過冀圖薄效少答鴻私

乞致仕第二表

睿訓丁寧曲加諭慰愚忠懇迫尚敢黷煩將再干於冕
旒宜先伏於砧鎖伏念臣世惟寒陋少若奇屯識不達

於古今學僅知於章句名浮於實用之始見於無能器
小易盈過則不勝於幾覆徒以早際千齡之亨會誤蒙
三聖之獎知寵榮既溢其涯憂患亦隨而至稟生素弱
顧身未老而先衰大道甚夷嗟力不前而難強每念思
私之莫報兼之疾病以交攻爰於守毫之初遂決竄漳
之計逮此三遷於歲律又更兩易於州符而犬馬已疲
理無復壯田廬甚邇今也其時是故更殫螻蟻之誠仰
冀乾坤之造况今時不乏士物咸遂生鳧鴈去來固不

為於多少鳶魚上下皆自適於飛潛苟遂出於殘骸庶
少償其夙志伏望皇帝陛下哀憐舊物隱惻至仁察其
有素非偽之誠成其識分知止之節曲從其欲賜報曰
俞俾其解組官廷還車故里披裘散髮逍遙垂盡之年
鑿井耕田歌詠太平之樂其為榮幸曷可勝陳

乞致仕第三表

恩深煦嫗感激涕洟雖情有迫於危心不知自止而辭
已窮於累牘幾至無言惟以至誠期於必達自乞憐於

君父不復訊於蓍龜伏念臣家世單平性姿中下少從
官學本免饑寒不自意於遭逢遂進階於華顯然而羣
材方茂蒲柳未秋而早衰衆駿並馳駑駘中道而先乏
而况荷難勝之任用竊逾分之寵榮風波憂畏而慮以
深疾病侵凌而老亦至故自辭於幾政即願謝於軒裳
蒙上聖之至仁念三朝之舊物每曲煩於訓諭久未忍
於棄捐竊惟臣之事君必本忠信言不顧行是為罔欺
而臣口日誦於田間身坐貪於祿利可畏至公之議何

施有覲之顏每自省循莫遑啓處是敢罔避再三之煩
黷猶希萬一之矜從伏望皇帝陛下特軫天慈俯回睿
聽察前言之可復蓋屢請者有年哀下愚之不移俾卒
成於素志徇其所欲乞以殘骸臣若得上印綬於有司
自駕柴車而即路晚節知無於大過沒身永荷於鴻私
謝宣召入翰林表

具官臣某言某月日蒙聖旨召臣入翰林者使車八里
君命在門閭巷驚傳宜識朝廷之故事縉紳竦歎以為

儒者之至榮在臣之愚何以堪此竊以文章之任自古
匪輕待遇寵榮至有私人之目詢謀獻納因加內相之
名恩既異於常倫人愈難於稱職伏念臣器非宏遠識
匪該明學不通今古之宜才不適方圓之用久叨塵於
侍從曾莫著於勞能而自出守外藩近遭家禍苟存餘
喘復齒周行風波流落者十年天日再瞻於雙闕進退
之際已蕭颯於霜毛慰勞有加賜憫憐於玉色形神若
此志意可知身已分於早衰心敢萌於希進加以羈危

之迹仇嫉交攻進退動係於羣言議論多煩於睿聽雖
覆載有造每賜保全而孤塞偷安常思引去伏蒙皇帝
陛下俯憐舊物曲軫宸慈偶因闕員遂俾承乏臣敢不
勉尋舊學益勵前修感遺簪未棄之仁竭駑馬已疲之
力庶俾薄效少答洪恩

謝除樞密副使表

臣某荷蒙聖慈除為樞密院副使者右樞虛府充位宜
求於雋賢多士盈庭誤選乃先於庸妄既牢辭之靡獲

徒以寵而為憂

中謝

伏念臣少本賤愚初無志慮為小

人之事力不勝於負薪程有司之文學止期於干祿過
被仁恩之樂育早從英俊之並遊遂叨侍從之流久玷
論思之地方時求治殆無補於分毫顧質早衰况漸凋
於齒髮但思藏縮敢望甄陞矧惟贊萬事之幾必也極
一時之選豈容濫得猥以備員當命令之始行方惶惑
以自失而睿恩至渥召旨甚嚴莫諧懇避之誠徒負貪
榮之媿此盖伏遇皇帝陛下廓天地之量垂日月之光

憐樸直之無他謂驚疲之可免俾承闕乏以效拙勤臣
敢不奮勵無能之姿感激難遇之會職思以位庶免於
曠官謀不以身少期於報國

謝除刑部尚書表

臣某荷國厚恩除為刑部尚書者職清書殿實為儒者
之榮望峻天臺仍忝刑官之重內循謏薄仰玷光華

中

謝
伏念臣某稟質迂愚粗知業履因時幸會遂竊寵靈
無拾遺補闕之勤常陪法從非大冊高文之手久廁翰

林濫綴宰寮俾聞國論荷三朝之眷遇每察懦忠幸四海之清平得容尸祿居滿盈而不戒積災釁以自貽屬聖統之嗣興赫皇明而繼照誣言詰服已大釋於羣疑危跡保全俾不虧於素守犬馬合思於報效桑榆奈迫於衰遲屢貢懇私上干聰睿遂蒙開允俾解繁機然而晚節餘生本期避寵清資顯秩益更貪榮被優渥之非常但凌兢而失措此蓋伏遇皇帝陛下聖神御極亭育推恩閔孤拙之勢危無容自立謂疲駑之力竭難責遠

途曲軫至慈俯從誠請仍憐舊物特示殊恩顧非木石
之頑宜識乾坤之造颯然素領雖難強於筋骸皎若丹
心猶自期於塵露

青州謝上表

掌國五兵叨進中臺之秩宣風一面俾綏東土之人祇
荷寵榮徒知隕越

中謝

伏念臣學非通敏材實空疎幸

逢千載之休明誤被三朝之獎擢久陪法從常與政機
國恩未報而身已先衰世途可畏而命亦多蹇頃緣災

疾遂決退休敢期上惻於皇慈未忍遽捐於舊物而復過承優渥以慰癯殘惟孤拙之無堪蹈艱危而已甚世之所榮者臣之所懼人以為寵者臣以為憂是敢輒殫悃幅之誠累黷高明之聽迫於危慮罔避煩辭而聖度并容寬其罪戾恩言屢降譬以丁寧知成命之難回勉覲顏而祇受而况全齊舊壤負海奧區民俗富完而耕田鑿井各安其業詔條寬大而奉法守職足以修宮內省庸虛奚勝忝幸此蓋伏遇皇帝陛下日新求治天覆

推仁謂簪履雖為賤微尚堪收錄而犬馬苟豐於養猶可使令臣敢不策勵疲羸勤思夙夜務期盡瘁少答鴻私

永興謝上表

司馬君實

荷恩至重任責尤深循撫吏民敷宣詔令臣識慮闇淺規為疎闊唯知愚忠屢貢狂直奉事三世操守一心間以齒髮寢衰疾疹交集曾靡論思之效久汙侍從之班既無補於本朝祈自安於散地不圖睿澤更委名都雖

要重之權自知不稱而煩劇之地難以固辭受命以還
措躬無所竭來就道甫爾到官維此咸秦昔為畿甸山
川秀美土地膏腴論其平時誠為樂土在於今日適值
凶年經夏亢陽苗青乾而不秀涉秋淫雨穗黑腐而無
收廩食一空家乏蓋藏之粟襁負相屬道有流離之人
老弱懷溝壑之憂姦猾蓄萑苻之志正宜安靜不可動
搖譬諸烹魚勿煩擾則免於糜爛如彼種木任生植則
自然蕃滋謹當策勵疲駑彫磨朽鈍智力所及勤瘁無

辭雖復失位危身終不病民負國庶幾小補用答大恩

定州謝表

呂晦叔

尸榮右府無裨廟算之奇假守中山復當閫制之重戴
恩為懼虔命以行適屆郡封恪宣條詔伏念臣降才謏
薄植性懦愚學術不足以稽五謀之疑識慮不足以籌
千里之勝特以百年舊族荷累聖不貲之恩一介微軀
辱主上非常之遇夤緣寵渥更踐清華晚收疎外之孤
蹤擢贊微幾之要務奉天光而咫尺被聖誨之丁寧謂

臣世服近寮有均休共戚之義寮臣傍無厚援絕背公
死黨之嫌曲示優容俾思報效顧駕鈇之難強嗟蒲柳
之易衰久預柄司積有妨賢之畏洊祈麾寄更圖陳力
之方伏遇陛下體虛靜以儲神極高明而盡下俯矜素
悃特霑俞音惟定武之奧區據朔陞之重地尚叨付委
靡即棄捐仍進叙於文階且兼華於秘殿併將厚意增
賁舊臣夙侍軒墀實司樞要統治軍經武之要洎守塞
禦戎之宜日夕睿謀備觀宸斷逮茲臨遣得以遵承謹

當細大必躬夙宵彌勵進不敢希功而生事退不敢弛
備以曠官期不玷於誤知庶少酬於鴻施臣無任云云

密州謝表

蘇子瞻

臣軾言昨奉勅差知密州軍州事已於今月三日到任
上訖草芥賤微敢干洪造乾坤廣大曲遂私情受命撫
躬已自知於不稱入境問俗又復過於所期中謝伏念

臣家世至寒性資甚下學雖篤志本先朝進士篆刻之
文論不適時皆老生常談陳腐之說分於聖世處以散

材一自離去闕庭屢更歲籥塵埃筆硯漸忘舊學之淵
源奔走簿書粗識小人之情偽欲自試於民社庶有補
於涓埃以為公朝不廢私願携孥上國預憂桂玉之不
充請郡東方實欲弟昆之相近自惟何幸動獲所求雖
父兄所以處臣其僥倖不過如此雖云疎外有此遭逢
此蓋伏遇皇帝陛下躬上聖之資建太平之業以為人
無賢愚皆有可用故雖如臣等輩猶未盡捐臣敢不仰
諗至恩益堅素守推廣中和之政撫綏疲瘵之民要使

民之安臣則為臣之報國

徐州謝表

臣軾言分符高密已竊名邦改命東徐復塵督府荷恩

深厚撫已兢慙

中謝

伏念臣奮身農畝託迹書林信道

直前曾無坎井之避立朝寡助誰為先後之容向者屢
獻瞽言仰塵聖鑒豈有意於為異蓋篤信其所聞顧慙
迂闊之言雖多而無益惟有朴忠之素既久而猶堅遠
不忘君未忍改其常度言之無罪實深恃於至仁知臣

者謂臣愛君不知臣者謂臣多事空懷此意誰復見明
伏惟皇帝陛下日月照臨乾坤覆幬察孤危之易毀諒
拙直之無他安全陋軀畀付善地民淳訟簡殊無施設
之方食足身閒仰愧生成之賜顧力報之無所懷孤忠
而自憐

徐州謝獎諭表

臣軾言伏奉今月四日勅以臣去歲修城捍水粗免踈
虞特賜獎諭者奔走服勤人臣之常事褒稱勞勩學者

之至榮自惟何人乃辱斯語

中謝

伏念臣學無師法才

與世踈經術既以不深吏事又其所短累忝優寄卒無
異稱寬如定遠之言平平無取拙比道州之政下下宜
然乃者河決澶淵毒流淮泗百堵皆作蓋僚吏之劬勞
三板不沉本朝廷之威德而臣下掠衆美上貪天功獨
竊璽書之榮以為私室之寶此蓋伏遇皇帝陛下天覆
四海子養萬民哀無辜之遭罹特遣使以存問既蠲免
其賦調又飲食其饑寒所以錄臣之微勞蓋將責臣之

來效臣敢不躬親畚築益修今歲之防安集流亡盡復
平時之業庶殫朽鈍少補絲毫

徐州賀河平表

臣軾言竊聞黃河決口已遂閉塞者聖謨獨運天眷莫
違庶邦子來民罔告病萬杵雷動役不逾時遂消東南
莫大之憂然後麥禾可得而食人無後患喜若再生伏
以大河為災歷世所病禹治兗州之野十有三載乃同
漢築宣防之宮二十餘年而定未有收狂瀾於既潰復

故道於將湮俛仰而成神速若此恭惟皇帝陛下至仁
溥施神智無方達四聰以來衆言廣大孝以安宗廟水
當潤下河不溢流屬歲久之無虞故患生於所忽方其
決也本吏失其防而非天意及其復也蓋天助有德而
非人功振古所無溥天同慶惟豐沛之大澤實汴泗之
所鍾伊昔橫流凜孤城之若塊殆茲平定蔚秋稼以如
雲害既廣則利多憂獨深而喜倍雖官守有限不獲趨
外庭以稱觴而民意所同亦能舒下情而作頌

湖州謝表

臣軾言蒙恩就移前件差遣已於今月二十日到任上
訖者風俗阜安在東南號為無事山水清遠本朝廷所
以優賢顧惟何人亦與茲選

中謝

伏念臣性資頑鄙名

迹湮微議論濶疎文學淺陋凡人必有一得而臣獨無
寸長荷先帝之誤恩擢寘三館蒙陛下之過聽付以兩
州非不欲痛自激昂少酬恩造而才分所局有過無功
法令具存雖勤何補罪固多矣臣猶知之夫何越次之

名邦更許借資而顯授顧惟無狀豈不知恩此蓋伏遇
皇帝陛下天覆羣生海涵萬族用人不求其備嘉善而
矜不能知其愚不適時難以追陪新進察其老不生事
或能牧養小民而臣頃在錢塘樂其風土魚鳥之性既
自得於江湖吳越之人亦安臣之教令敢不奉法勤職
息訟平刑上以廣朝廷之仁下以慰父老之望

黃州謝表

臣軾言去歲十二月二十九日准勅責降臣檢校尚書

水部員外郎充黃州團練副使本州安置不得簽書公
事臣已於今月一日到本州訖者狂愚冒犯固有常刑
仁聖矜憐特從輕典赦其必死許以自新祇服訓辭惟
知感涕中謝伏念臣早緣科第誤忝縉紳親逢睿哲之
興遂有功名之意亦嘗召對便殿考其所學之言試守
三州觀其所行之實而臣用意過當日趨於迷賦命衰
窮天奪其魄叛逆義理辜負恩私茫如醉夢之中不知
言語之出雖至仁屢赦而衆議不容案罪責情固宜伏

斧鑕於兩觀推恩屈法猶當禦魑魅於三危豈謂尚玷
散員更叨善地投畀麇麋之野保全樗櫟之生臣雖至
愚豈不知幸此蓋伏遇皇帝陛下德刑並用善惡兼容
欲使法行而知恩是用小懲而大誡天地能覆載之而
不能容之於度外父母能生育之而不能出之於死中
伏惟此恩何以為報惟當蔬食沒齒杜門思愆深悟積
年之非永為多士之戒貪戀聖世不敢殺身庶幾餘生
未為棄物若獲盡力鞭箠之下必將捐軀矢石之間指

天誓心有死無易

謝失察妖賊表

臣軾言去年十二月十五日准淮南轉運司牒奉聖旨
差官取勘臣前任知徐州日不覺察百姓李鐸郭進等
謀反事臣尋具析在任日曾選差沂州百姓程棐令緝
捕凶逆賊人致棐告獲前件妖賊因依乞勘會施行至
今年七月二日復准轉運司牒坐准尚書刑部牒奉聖
旨竊軾送尚書刑部更不取勘盜發所臨守臣固當重

責罪疑則赦聖主所以廣恩自驚廢逐之餘猶在憫憐

之數

中謝

伏念臣早蒙殊遇擢領大邦上不能以道化

民達忠孝於所部下不能以刑齊物消奸究於未萌致使妄庸敢圖僭逆原其不職夫豈勝誅况茲溝瀆之中重遇雷霆之譴無官可削撫已知危至於捕斬羣盜之功乃是隣近一夫之力靖言其始偶出於臣雖為國督姦常懷此志而因人成事宜足言勞勉自列於涓埃庶少寬於斧鉞豈謂蕩然之澤許以勿推收驚魄於散亡

假餘生之晷刻退思所自為幸何多此蓋伏遇皇帝陛下舞虞舜之干示人不殺祝成湯之網與物俱生其間用刑本不得已稍有可赦無不從寬務在考實而原情何嘗記過而忘善益悟向時之所坐皆是微臣之自貽感愧終身論報無地布衣蔬食或未死於饑寒石心木腸誓不忘於忠義

謝量移汝州表

臣軾言伏奉正月二十五日誥命特授臣汝州團練副

使本州安置不得簽書公事者稍從內遷示不終棄罪
已甘於萬死恩實出於再生祇服訓辭惟知感涕中謝
伏念臣向者名過其實食浮於人兄弟並竊於賢科衣
冠或以為盛事旋從冊府出領郡符既無片善可紀於
絲毫而以重罪當膏於斧鉞雖蒙恩貸有愧平生隻影
自憐命寄江湖之上驚魂未定夢遊縲紲之中憔悴非
人猖狂失志妻孥之所竊笑親友至於絕交疾病連年
人皆相傳為已死饑寒併日臣亦自厭其餘生豈謂草

芥之賤微尚煩朝廷之紀錄開其恫悔許以甄收此蓋
伏遇皇帝陛下湯德日新堯仁天覆建七廟以安祖考
正六官而修典刑百廢俱興多士爰集彈冠結綬共欣
千載之逢掩面向隅不忍一夫之泣故推涓滴以及焦
枯願惟效死之無門殺身何益更欲呼天而自列尚口
乃窮徒有此心期於異日

乞常州居住表

臣軾言臣聞聖人之行法也如雷霆之震草木威怒雖

甚而歸於欲其生人主之罪人也如父母之譴子孫鞭撻雖嚴而不忍致之死臣漂流棄物枯槁餘生泣血書詞呼天請命願回日月之照一明葵藿之心此言朝聞夕死無憾

中謝

臣昔者嘗對便殿親聞德音似蒙聖知

不在人後而狂狷妄發上負恩私既有司皆以為可誅雖明主不得而獨赦一從吏議坐廢五年積憂熏心驚齒髮之先變抱恨刻骨傷皮肉之僅存近者蒙恩量移汝州伏讀訓辭有人材實難弗忍終棄之語豈獨知免

於縲紲亦將有望於桑榆但未死亡終見天日豈敢復以遲暮為歎更生僥覲之心但以祿廩久空衣食不繼累重道遠不免舟行自離黃州風濤驚怒舉家重病一子哀亡今雖已至泗州而貲用罄竭去汝尚遠難於陸行無屋可居無田可食二十餘口不知所歸饑寒之憂近在朝夕與其疆顏忍恥干求於衆人不若歸命投誠控告於君父臣有薄田在常州宜興縣粗給饘粥欲望聖慈許於常州居住又恐罪戾至重不可聽從便安輒

叙微勞庶蒙恩貸臣先任徐州日以河水浸城幾至淪陷臣日夜守捍偶獲安全曾蒙朝廷降勅獎諭又嘗選用沂州百姓程棐令追捕凶黨致獲謀反妖賊李鐸郭進等一十七人亦蒙聖恩保明放罪皆臣子之常分無涓埃之可言冒昧自陳出於窮迫庶幾因緣僥倖功過相除稍出羈囚得從所便重念臣受性剛褊賦命奇窮既獲罪於天又無助於下怨讎交積罪惡橫生羣言或起於愛憎孤忠遂陷於疑似中雖無愧不敢自明向非

人主獨賜保全則臣之微生豈有今日伏惟皇帝陛下
聖神天縱文武生知得天下之英才已全三樂躋斯民
於仁壽不棄一夫勃然中興可謂盡善而臣抱百季之
永歎悼一飽之無時貧病交攻死生莫保雖鳬鴈飛集
何足計於朝廷而犬馬蓋帷猶有求於陛下敢祈仁聖
少賜矜憐臣見一面前去至南京以來聽候朝旨

到常州謝表

臣軾言先蒙恩授汝州團練副使本州安置尋上表乞

於常州居住奉聖旨依所乞臣已於今月二十二日到
常州訖者積釁難磨未經洗滌至仁易感許即便安祇
荷寵靈惟知感涕

中謝

伏念臣所犯罪戾本合誅夷向

非先帝之至明豈有餘生於今日銜恩未報有志不從
已分沒身寄殘骸於魑魅敢期擇地收暮景於桑榆此
蓋伏遇皇帝陛下仁孝生知聰明天縱寅奉上帝之眷
命述修累聖之成謀念此管蒯之微庶幾簪履之舊俾
安田畝稍出縲囚飽食無思但日陶於新化杜門自省

當益念於往愆

登州謝表

臣軾言伏奉誥命授臣朝奉郎知登州軍州事臣已於
今月十五日到任上訖者登雖小郡地號極邊自驚縲
紲之餘忽有民社之寄拜恩不次隕涕何言

中謝

臣聞

臣不密則失身而臣無周身之智人不可以無學而臣
有不學之愚積此兩愆本當萬死坐受六年之謫甘如
五鼎之珍擊鼓登聞止求自便買田陽羨誓畢此生豈

期枯朽之中有此遭逢之異收招魂魄復為平人洗濯
瑕疵盡還舊物此盖伏遇皇帝陛下內行曾閔之孝外
發禹湯之仁日將旦而四海明天方春而萬物作於其
黨而觀過謂臣或出於愛君就所短而求長知臣稍習
於治郡致茲異寵驟及非才恭惟先帝全臣於衆怒必
死之中陛下起臣於散官永棄之地沒身難報碎首為
期

登州謝宣詔赴闕表

欽定四庫全書

唐宋元名表
卷上之二

李西

仕路崎嶇羣言推阻雖死生不變乎已况用舍豈累其

懷

中謝

臣草野微生雕虫末學昔從仁廟誤蒙拔擢之

恩旋至神宗亦荷優嘉之禮祇合俯身從衆卑論趨時
柰何明不自知諫於未信屢遭譴罰實自己為力當勉
於苟安悔欲追於何及以此遷延歲月荏苒塵埃望已
絕於朝端志必期於老死此蓋伏遇皇帝陛下躬成王
之幼賴文母之賢輔成天縱之才訓導日躋之聖斯民
多幸神斷至公凡所有為稍復用舊况秉節推忠之士

將欲甄收而作新立法之人旋行降黜如臣者擢從遠
郡俯屆大邦豈意寒灰之復然試其駑馬之再駕每思
至此其念尤深

謝中書舍人表

臣言伏奉制命授臣試中書舍人仍改賜章服者右史
記言已塵高選西垣視草復玷近班皆儒者之至榮豈
平生之敢望

中謝

竊以詞命之職古今所難非獨取之

於文蓋將試之以事至於機務亦或與聞雖四戶擅權

欽定四庫全書

唐宋元名表
卷上之二

五

非當時之公議而五花判事亦前代之美談及夫三字
之除乃是一切之政但謂內朝之法從安知宰相之屬
官既任止於訓辭故權移於胥吏恬不知怪習為故常
先皇帝道冠百王法垂萬世建六官而修故事闢三省
以待異人典章一新名實皆正遂申明於四禁俾分領
於六曹遠則追直閣之司近則通檢正之任雖未聞政
而聞事蓋須有德而有言如臣之愚無一而可草創潤
色既非鄭國之材除書德音又乏唐人之譽忽當此選

莫測其由此蓋伏遇皇帝陛下將聖與仁能哲而惠雖
在三年不言之際已有十日並照之光而臣日侍邇英
親聞訪道仰天威之甚近知聖鑒之難逃謂臣嘗受先
朝之知實無左右之助棄瑕往昔責效將來臣敢不益
勵素心無忘舊學上體周公煩悉之誥助成漢家深厚
之文苟無曠官其敢言報

又表

臣試言伏奉制命授臣試中書舍人仍改賜章服者聖

神獨斷出成命於省中衰病增光溢虛名於朝右訓詞
之重士論所榮

中謝

臣聞有言逆心此古人所以顛沛

積毀消骨非聖主莫能保全臣本受知於裕陵亦嘗見
待以國士嘉其好直許以能文雖竄謫流離之餘決無
可用而哀憐收拾之意終不少衰抱弓劍以長號分簪
履之永棄豈期晚遇又過初心矧外制之深嚴極西垣
之清要在唐之盛以馬周岑文本為得人近世所傳有
楊億歐陽修之故事不試而用於今幾人遂超同列之

先遠繼前修之末夫何頑鈍有此遭逢此蓋伏遇太皇太后陛下憂國忘身愛民如子憂深故任其事者重愛極故為之慮也長敷求哲人以遺聖嗣所以兼收而並用庶幾有得於其間臣敢不盡其所能期於無愧始終自誓故常以道而事君夷險不同則必見危而授命

謝翰林學士表

臣軾言蒙恩除臣翰林學士知制誥者名微不稱寵至若驚伏念臣經術空疎吏能短淺少年自守無用於作

新去國生還適逢於求舊初何云補遽辱甄收此蓋伏
遇皇帝陛下文武生知聰明天縱法乾坤之廣運體日
月之照微過採虛名使陳薄技敢不激昂晚節砥礪初
心雖洪造之難酬盡微生而後已

謝宣召入院表

右臣今日西頭供奉官充待詔董士隆至臣所居奉
宣聖旨召臣入院充學士者詔語春溫再命而偃使華
天降一節以趨在故事以嘗聞豈平生之敢望省循非

稱愧汗交深竊以視草之官自唐為盛雖職親事祕號為北門學士之榮而祿薄地寒至有京兆掾曹之請豈如聖代一振儒風非徒好爵之縻兼享大烹之養玉堂賜篆仰淳化之彌文寶帶重金佩元豐之新渥既厚其禮愈難其人而臣以空疎冗散之材衰病流離之後生還萬里坐閱三遷不緣左右之容躡處賢豪之上此蓋伏遇皇帝陛下生資文武天祚聖神雖亮陰不言尚隱高宗之德而訪落求助已啓成王之心首擇輔臣次求欽定四庫全書

唐宋元名表
卷上之二

五八

謝賜對衣金帶馬表

臣軾言伏蒙聖慈以臣入院特賜衣一對金腰帶一條金鍍銀鞍轡馬一匹被三品之服章君子所以昭令德分六閑之駟駿朝廷所以旌有功顧惟何人亦與茲寵拜恩俯俚流汗交并

中謝

伏念臣人微地寒性迂才短

襲布韋而自薦偶忝縉紳駕款段以言歸終安畎畝豈謂便蕃之錫萃於衰病之軀此蓋伏遇皇帝陛下揔覽衆工財成大化至誠樂與有緇衣之好賢俊民用章無白駒於虛谷不違寒陋亦被光華攬佩以思遂識斷金之義舉鞭自誓敢忘希驥之心

又表

臣軾言伏蒙聖慈以臣入院特賜衣一對金腰帶一條金鍍銀鞍轡馬一匹命服出笥榮動縉紳左驂在庭光欽定四庫全書

唐宋元名表
卷上之二

五九

生徒馭德不稱物愧無所容

中謝

伏念臣衰朽無功蠢愚不學已分鷄梁之刺敢逃負乘之譏再惟此恩何自而至此蓋伏遇太皇太后陛下至仁廣運盛德兼容躬周公之勤勞而逸於委任寶老氏之慈儉而侈於禮賢致此光榮下及微陋慨然攬轡敢有意於澄清東以立朝尚可言於賓客

又表

臣軾言伏蒙聖慈特賜衣一對金腰帶一條金鍍銀鞍

轡一副馬一匹者出笥之珍已華朽質解駟之賜益耀
衆觀顧惟何人亦被茲寵

中謝

伏念臣少而拙訥老益

踈愚山野之資非文繡之所及疲駑之質雖鞭策以何
加方祈冗散之安更忝便蕃之錫此蓋伏遇皇帝陛下
緝熙儒術羅網人才不愛車服寵數之章使為吏民瞻
望之美據鞍有愧束衽知榮敢不奉以牧民永思去害
之指施之治邑庶無學製之傷

又表

臣軾言伏蒙聖恩

云

者命服斯皇詩詠周宣之德

康侯用錫易稱王母之仁惠澤所加臣工知勸

中謝

伏

念臣資材朽鈍學術空疎矧茲衰病之餘豈復光華之
美荷寵章之蕃庶人以為榮顧形影之支離臣惟自愧
此蓋伏遇太皇太后陛下知人堯哲徧物舜仁時遣拾
遺補過之臣出為承流宣化之任子衣安吉不待請而
有之我馬虺隤蓋知勞而賜者敢不勉思忠盡務報恩
勤永為廐庫之珍莫非民力無忘獄市之寄以副上心

又表

右臣伏蒙聖慈特賜臣對衣一襲金腰帶一條銀鞍轡馬一匹者錫之上駟敢忘致遠之勞佩以良金無復折腰之恥執鞭請事顧影知慙恭惟皇帝陛下禹儉中修堯文外煥長轡以御率皆四牡之良所寶惟賢豈徒三品之貴出捐車服收輯事功而臣衰不待年寵常過分枯羸之質匪伊垂之而帶有餘歛退之心非敢後也而馬不進徒堅晚節難報深恩

又表

右臣伏蒙聖慈

云

者出笥之珍以旌有德在垧之

駟豈及無功而臣首尾四年叨塵三錫省躬內灼服寵
汗流恭惟太皇太后陛下慈儉自居龍光四達德被海
宇豈惟一襲之衣恩結華夷何止十圍之帶羣賢在御
六轡自調而臣頃以衰羸伏求安便奉宣德意庶幾五
袴之謠收歛壯心無復千里之志更期力報有愧空言

謝除侍讀表

臣軾言今月一日蒙恩除臣兼侍讀者學術本疎老復加於蹇訥官聯愈近職專在於討論退省其愚莫知所措中謝伏以天威咫尺顧末技以何施聖敬日躋豈羣

臣之敢望非張禹倪寬之篤學無褚量懷素之懿文則何以奉天子五學之游求王人多聞之益如臣愚昧何與選掄此盖伏遇皇帝陛下卓然生知輔以好學方高宗恭默之後正宣帝勵精之初衆論並陳悉洞照其情偽陳編一覽已周知於廢興察臣衰病而無求庶可親

近而寡過故茲拔用驟及疲駑臣敢不溫故知新謹守
有司之職見危授命更輸異日之忠

又表

臣軾言今月

云

云者北門視草已叨儒者之極榮西

學上賢復玷侍臣之高選省循非稱愧汗交懷

中謝

竊

惟講讀之臣止以言語為職考功課吏無殿最之可書

陳善閉邪有膏澤之潛潤豈臣愚陋亦所克堪此蓋伏

遇太皇太后陛下憂思深長德業久大受先帝投艱之

托為神孫經遠之謀故選左右前後之人罔非吉士使
知興亡治亂之效莫若多聞謂臣雖無大過人之才知
臣粗有不欺君之實故使朝夕與於討論奉永日之清
閒未知所報畢微生於盡瘁終致此心

賀明堂赦書表

臣軾言宗祀禮成修累朝之盛典端門肆青荅萬宇之
懽心凡有識知舉增忭躍中賀竊謂祖宗恩信之所被
譬如天地寒暑之不差將推作解之仁必在當郊之歲

恭惟皇帝陛下憲章六聖左右三靈上帝眷而風雨時
壬人去而蠻夷服講明大禮對越昊天懷柔百神嚮用
五福大河修復奏軌道於東流藩邸顧懷錫鴻名於西
府臣備員法從待罪守臣想聞路寢之鼓鐘曾叨奉引
嘉與海宇之草木同被恩私

又表

臣軾言嚴配禮成民心知孝好生德洽天下歸仁凡蒙
一洗之恩舉有惟新之喜

中謝

伏以功存廟社而辭其

禮德及草木而諱其名此聖人之所難幸微生之親見
恭惟太皇太后陛下勲高任似道配唐虞顧惟致治於
和平孰不歸心於保佑合宮均福畢修累聖之文會慶
告成不居先后之位臣職叨禁從身遠闕庭既欣渙汗
之私溥霑動植更喜謙光之美獨冠古今

謝賜御書詩表

臣軾言今月十五日賜宴東宮伏蒙聖恩差中使就賜
臣御書詩一首者玉笋上尊霈若雲天之澤寶章宸翰

煥乎奎壁之文喜溢心顏先生懷袖伏念臣猥緣末技
獲玷清流早歲數竒已老江湖之上餘生何幸得依日
月之光入侍燕閒與聞講學卒桓榮之業因人而成登
劉洎之床則臣豈敢夫何珍賜亦及微軀此盖伏遇皇
帝陛下道本生知才惟天縱文不數於游夏書已逼於
鍾王心慕手追陋文皇之曲學筆縱字大笑宋武之未
工知臣遭遇之難欲以顯榮其老鏤之金石庶傳玩於
人人付與子孫俾輸忠於世世

謝除龍圖閣學士表

臣軾言伏蒙聖恩以臣累章請郡特除臣龍圖閣學士知杭州者中禁寶儲上應奎壁之象先朝謨訓遠同河洛之符隸職其間省躬非據

中謝

伏念臣學非有得愚至

不移雖叨過實之名卒無適用之器少時妄意蓋嘗有志於事功晚歲積憂但欲歸安於田畝屬聖神之履運荷識拔之非常猶冀桑榆之收遽迫犬馬之疾力求閒散庶免顛隳豈謂皇帝陛下聖度包荒天慈委照察其

才有所短不欲彊置之禁嚴知其進不由人故特保全其終始遂加此職以責其行臣敢不仰緣末光益勵素守往何之而不可中無愧之為安但未死亡必期報塞

又表

臣軾言云云者北扉清密久愧素餐內閣深嚴復膺殊寵以榮為懼有醜在顏中謝伏念臣賦命數奇與人多忤

遭遇仁祖忝竊賢科繼蒙英廟之深知尤荷裕陵之見器而流離若此窮薄可知晚親日月之光常恐甑壘之

溢故求閒散以避災屯豈謂太皇太后陛下天高聽卑
坤厚載物愛惜臣下固無異於子孫委任官師本不分
於中外致茲衰病不失清華然臣辭寵而益榮求閒而
得劇雖云稍遠於事地尚恐終非其久安敢不磨鈍自
修履冰知戒庶全孤節少答殊私

杭州謝表

臣軾言伏奉制書除臣龍圖閣學士知杭州已於今月
三日到任上訖者始衰而病豈非溢滿之災乞越得杭

又過平生之望

中謝

伏念臣起自廢黜驟登禁嚴畢命

驅馳未償萬一懷安退縮豈所當然蓋散材不仕於斧斤而病馬空縻於芻粟故求外補以盡餘生豈期避寵而益榮求閒而得劇此蓋伏遇皇帝陛下剛毅中正緝熙光明無為蓋虞舜之仁篤學有仲尼之智而臣猥以末技日奉講帷凜然威光近在咫尺惟古人責難之意每不自量方陛下好問之初遽以疾去推之理數可謂其窮荷眷遇之不移竊思榮之愈重雖雨露之施初不

擇物而犬馬之報期於殺身

又表

臣軾言云云入奉禁嚴出膺方面皆人臣之殊遇在儒者以尤榮

中謝

伏念臣受寵逾涯積憂成疾既思退就

於安養又欲少逃於滿盈仰荷至仁曲從微願江山故國所至如歸父老遺民與臣相問知朝廷輟近侍為太守蓋聖主視天下如一家鞭扑未施爭訟幾絕臣之厚幸豈易名言此蓋伏遇太皇太后陛下天地之仁賢愚

兼取日月之照邪正自分每包含其蠢迂欲保全其終始兄弟孤立嘗親奉於德音死生不移更誓堅於晚節

杭州放罪謝表

臣軾言臣近以法外刺配本州百姓顏章顏益三人上章待罪奉聖旨特放罪者職在承宣當遵三尺之約束事關利害輒從一切之便宜曲荷天慈不從吏議

中謝

伏念臣早緣剛拙屢致憂虞用之朝廷則逆耳之奏形於言施之郡縣則疾惡之心見於政雖知難每以為戒

而臨事不能自回苟非日月之明肝膽必照則臣豈惟
獲罪於今日久已見傾於衆言恭惟皇帝陛下睿哲生
知清明旁達委任羣下退託於不能受養成材惟恐其
有過知臣欲去一方之積弊須除二猾以示民特屈憲
章以全器使臣敢不省修過咎祇服簡書眷此善良自
不犯於漢法時有貸舍用益廣於堯仁

又表

亂羣之誅不請而決蓋恩威之無素致姦猾之敢行方

俟譴呵豈期寬宥伏以法吏網密蓋出於近年守臣權輕無甚於今日觀祖宗信任之意以州郡責成於人豈有不擇師帥之良但知繩墨之馭若平居僅能守法則緩急何以使民顧臣不才難以議此恭惟太皇太后陛下寬仁從衆信順得天推一身之至公納萬方於無罪而臣始終被遇中外蒙恩謂事有專而合宜情無他而可恕故加貸舍以示寵綏朝廷之明粗以臣為可信吏民自服當不令而率從

潁州謝表

臣軾言伏奉聖恩除臣龍圖閣學士知潁州臣於今月
二十二日到任訖者避嫌引疾懇無國士之風識分知
難粗守人臣之節曲蒙溫詔遂假名邦已見吏民惟知
感忤中謝伏念臣早緣多難無意軒裳晚以虛名偶塵
法從雖云時可每與願違既未決於歸田故力求於治
郡慈母愛子但憐其無能明君知臣終護其所短自欣
投老漸獲安身此蓋伏遇太皇太后陛下慈儉臨民剛

柔布政參天地而有信喜怒不偏體冰鑑之無心忠邪自辨致茲愚直亦克保全雖任職居官無過人者而見危授命蓋有志焉

又表

支郡責輕未即滿盈於小器豐年事簡非徒飽煖於一家覽几席之溪湖雜簿書於魚鳥平生所樂臨老獲從中謝伏以汝頡為州邦畿稱首土風備於南北人物推於古今賓主俱賢蓋宗資范孟博之舊治文獻相續有

晏殊歐陽修之遺風顧臣何人亦與茲選此蓋伏遇皇
帝陛下丕承六聖總覽羣英生知仁孝之全學識文武
之大謂臣簪履之舊物膏忝帷幄之近臣奉事七年崎
嶇一節意其忠義許國故暫召還察其老病畏人復許
補外置之安地養此散材更少勉於桑榆誓不忘於畎
畝

揚州謝表

臣軾言伏奉聖恩除臣知揚州臣已於今月二十六日

到任訖者一麾出守方愧媿安十國為連復膺寵寄恩

榮既溢慙汗靡寧

中謝

伏念臣本以鰕生冒居禁從頃

緣多病力求穎洧之行曾未半年復有廣陵之請蓋以
魚鳥之質老於江湖之間習與性成樂居其舊天從民
欲許擇所安恭惟皇帝陛下欽明文思剛健純粹天工
默運灼知萬化之情人材並收各取一長之用如臣衰
朽尚未遐遺命至蹇而祿已盈每懷憂懼志雖大而才
不副莫報恩私

定州謝表

兵民重寄本禦侮以折衝疆場久安但坐嘯而畫諾才
微祿厚恩重命輕

中謝

伏念臣一去闕庭三換符竹坐

席未煖召節已行筋力疲於往來日月逝於道路未經
周歲復典兩曹朝廷非不用臣愚憊自不安位所宜竄
逐更冒寵榮此蓋伏遇皇帝陛下離明正中乾健獨運
追述東朝之遺意收此散才眷言西學之舊臣付之善
地致此衰朽尚未棄捐臣敢不勤恤民勞密修邊備苟

無大過以及暮年漸還魚鳥之鄉以畢桑榆之樂

英州謝表

罪凶義絕誅九族以猶輕威震怒行真一州之太幸驚
魂方散感涕徒零

中謝

伏念臣草芥賤儒岷峨冷族襲

先人之素業借一第以竊名雖幼歲勤勞實學聖人之
大道而終身窮薄常為天下之罪人先帝全臣於衆怒
必死之中陛下起臣於散官永棄之地恩深報蔑每憂
天地之難欺福少禍多亦是古今之罕有自悲棄物猶

欲籲天惟上聖纂宗廟之圖方太母聽簾帷之政招延
俊乂登進老成何期章句之非材使掌絲綸之要職凡
一時黜陟進退之衆皆兩宮威福賞罰之公既在代言
敢思逴責苟不能敷揚上意尊朝廷於日月之明則何
以聳動四方鼓號令於雷霆之震固當昭陳功伐直喻
正邪豈臣愚敢有於私心蓋王言不可以匿指當時之
天奪其魄但謂守官今日之臣肆其言期於必戮賴父
母之深憫免子弟之皆誅罪雖駭於衆聞恩終歸於內

恕不獨再生於東市猶令尸祿於南州累歲寵榮固已
太過此時竄責誠所宜然瘴海炎歊去若清涼之域蒼
顏素髮誰憐衰暮之年恩重丘山感藏骨髓此蓋皇帝
陛下智惟天錫行自生知巍巍繼六聖之神休孜孜盡
三宮之孝養深原心迹曲示哀矜臣實何人恩常異衆
在先朝偶脫於誅戮故此日復煩於典刑頑戾若斯生
存何補臣敢不噬臍悔過吞舌知非草再三而不改之
非庶萬一有善終之望殺身莫喻敢懷窮困之憂守土

非輕尚牧遐荒之俗儻先朝露之化徒懷結草之忠

惠州謝表

臣軾言先奉誥命落兩職退一官以承議郎知英州軍
州事續奉誥命復責授臣寧遠軍節度副使惠州安置
已於今月二日到惠州公參訖者仁聖曲全本欲畀之
民社羣言交擊必將致之死亡尚荷寬仁止投荒服中
謝伏念臣性資褊淺學術荒唐但守不移之愚遂成難

赦之咎迹其狂妄久合誅夷方尚口乃窮之時蓋擢髮

莫數其罪豈謂天幸得全此生此蓋伏遇皇帝陛下以
大有為之資行不忍人之政湯網解其三面舜干舞於
兩階念臣奉事有年少加憐愍知臣老死無日不足誅
鋤明降德音許全餘息故使虺隤之馬猶獲蓋帷轂鯨
之牛得違刀几臣敢不服膺嚴訓托命至仁洗心自新
沒齒無怨但以瘴癘之地魑魅為隣衰病交攻無復首
丘之望精誠未泯空餘結草之忠

昌化軍謝表

臣軾言今年四月十七日奉被告命責授臣瓊州別駕
昌化軍安置臣尋於當月十九日起離惠州至七月二
日已至昌化軍訖者並鬼門而東驚浮瘴海以南遷生
無還期死有餘責中謝伏念臣頃緣際會偶竊寵榮曾
無毫髮之能而有丘山之罪宜三黜而未已跨萬里以
獨來恩重命輕咎深責淺此蓋伏遇皇帝陛下堯文炳
煥湯德寬仁赫日月之照臨廓天地之覆育譬之蠕動
稍賜矜憐俾就窮途以安餘命而臣孤老無托瘴癘交

政子孫慟哭於江邊以為死別魑魅逢迎於海外寧許
生還念報德之何時悼此心之未已俯伏流涕不知所
云

量移蘆州表

使命遠臨初聞喪膽詔辭溫眷乃返驚魂拜望闕庭喜
溢顏面否極泰至雖物理之常然昔棄今收豈罪餘之
敢望伏膺知幸揮涕無從中謝伏念臣頃以狂愚偶膺
譴責荷先朝之厚德寬蕭律之重誅投畀遐荒幸逃鼎

鑊風波萬里顧衰病以何堪烟瘴五年賴喘息之猶在
憐之者嗟其已甚嫉之者謂其太輕考圖經正繫海隅
以風土疑非人世食有併日夜無禦寒淒冷一身顛躓
萬狀恍若醉夢已無意於生還豈謂優容許承恩而近
徙雖有僥倖實無夤緣茲蓋伏遇皇帝陛下道本生知
聖由天縱舊勞於外爰知小人之依堪家多難監於先
王成憲奉聖母之慈訓擇正人而與居凡有嘉謀出於
睿斷憐臣以孤危寡援察臣以妬忌獲愆許以更新庶

其改過雖天地有化育之德不能使臣之再生雖父母
有鞠養之恩不能全臣於必死報期碎首言豈渝心濯
去泥塗已有遭逢之便擴開雲日復覩於變之時此生
豈敢求榮處已但知緘口

謝量移永州表

島上囚拘分安死所天邊渙汗詔許生還駐世之魂自
招合浦感涕之淚欲漲溟波中謝伏念臣生而愚朴少
也艱勤俵俵而行不知所屆衝衝而活何以為生言則

招憂動常速禍顧已於時齟齬使人費力保全仁宗之
朝早得名神考之朝終見貸謂宜飭躬自省去惡莫為
而乃肆言元祐之間放意太平之際几獲不虞之譽宜
任非常之辜過既暴聞衆知不赦先皇帝明罰勅法使
萬里以思愆今天子發政施仁無一夫之失所凡在名
籍舉賜洗湔俾離一海之中復至五嶺之外拜天恩之
優厚知聖化之密庸挈是破家航以一箒蛟鰐潜底風
濤不驚遂齊編戶之民不為異域之鬼視偕飛走謝施

乾坤天日彌高徒極馳心於魏闕鄉關入望尚期歸骨
於眉山殘生無與於殺身餘識終同於結草

提舉玉局觀謝表

臣軾言臣先自昌化軍貶所奉勅移廉州安置又自廉
州奉勅授臣舒州團練副使永州居住今行至英州又
奉勅授臣朝奉郎提舉成州府玉局觀在外州軍任便
居住者七年遠謫不自意全萬里生還適有天幸驟從
縲紲復齒縉紳中謝伏念臣才不逮人性多忤物剛褊


自用可謂小忠猖狂妄行乃蹈大難皆臣自取不敢怨
尤會真人之勃興與萬物而更始而臣獨在幽遠最為
冥頑迨茲起廢之初倍費生成之力乃蒙記錄不自棄
捐此蓋伏遇皇帝陛下正位龍飛對時虎變神武不殺
豈非受命之符清淨無為坐獲消兵之福聰明不作邪
正自分使臣得同草木之微共霑雷雨之解臣敢不益
堅素守深念往愆沒齒何求不厭飯蔬之陋蓋棺未已
猶懷結草之忠

謝除翰林承旨表

臣某言臣某出守某州某月日蒙聖旨召還擢為翰林承旨者使星下燭生蓬華之光華天澤旁流失桑榆之枯槁國有用儒之盛士知稽古之榮伏以翰墨之林號稱內相文章之外不取他才至於用人可以觀政文武並用或成頗牧之功邪正雜居至有怀文之患惟貴且近故難其人而况金鑾玉堂親被絲綸之密北扉東閣獨稱年德之高必有異人以齊衆口而臣本緣衰病出

守江湖以一方凋弊之餘當二年水潦之厄戴星而治
僅免流亡及瓜而還恍如夢寤交親迎勞井邑聚觀驚
華髮之半空笑丹心之未折宜投閒散以養衰殘豈期
過採於虛名復使榮加於舊物此蓋伏遇皇帝陛下德
同乾健明配日中既祖述於堯仁復躬行於舜教才難
之嘆人誦斯言緣先帝之德音收孤臣於散地言雖直
而無罪身愈遠而益親委曲保全始終錄用臣敢不更
磨朽鈍少補涓埃難得者時未有捐軀之會勿欺而犯

誓無患失之心



唐書元名表卷上之二